

Ullukinnerup aningaasarsiaqaannarluni sulinngiffinngortinneqarnissaanut periarfissamik qulaajaasumik Naalakkersuisut nassuiaasiornissaat pillugu Inatsisartunut aalajangiiffigisassatut siunnersuut. Nassuiaat inatsiseqarnikkut apeqqutaasinnaasunik tassunga attuumasunik qulaajaasuussaaq, taamatullu aamma aningaasaqarnikkut allaffissornikkullu kinguneqaatinik qulaajaasuussalluni. Nassuiaat UPA2023 sioqqullugu saqqummiunneqassaaq.

(Inatsisartunut ilaasortaq Kristian Jeremiassen, Inuit Ataqatigiit)

Akissuteqaat

(Aningaasaqarnermut Naligiissitaanermullu Naalakkersuisoq)

Siullermeerneqarnera

Naalakkersuisut ullukinneq sulinngiffinngortinneqarnissaanut aalajangiiffigisassatut siunnersuut qujassutigaat.

Ilinniartitaanermut, Kultureqarnermut, Timersornermut Ilageeqarnermullu Naalakkersuisup siusinnerusukkut Ullukinnerup akissarsiaqartillugu sulinngiffinngortinneqarnerani aningaasaqarnikkut allaffissornikkullu kingunerisassat Naalakkersuisut qulaajassagaat oqaatigaa. Tamanna Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup ataani aallartinneqarpoq.

Aningaasarsiaqarluni sulinngiffeqarfiit, soorlu 1. januar aamma 21. juni, suliffeqarnermi illuatungeriit isumaqatigiissutaannit tunngaveqarput.

Naalakkersuisut tunngaviatigut kiffaanngissuseqarluni isumaqatiginninniarsinnaaneq ataqpineqassasoq isumaqarput, taamaasilluni aningaasarsiatigut atorfinitsitaanermilu atugassarititaasut suliffeqarnermi illuatungeriit isumagineqartassamat. Taamaamat suliffeqarnermi illuatungeriit ullorsiornermi¹ imaluunniit nalliuttuni aningaasarsiaqaannarluni assigisaanilluunniit sulinngiffeqartarnissaq aalajangertassavaat.

Siunnersuuteqartup siunnersuutimi oqaluttuarisaanikkut ullukinnerup tunuliaqutai, aamma ulloq kinaassutitsinnut ilaanera erseqqissaatigaa. Ullukinneq nunatta avannaani ingammik pingaartinneqarpoq nalliuttorsiutigineqartarlunilu, taamaalillunilu ullorsiorneq ileqqutoqqaneerluni. Naalakkersuisut tamanna eriagerusuppaat ineriartortillugulu.

Naalakkersuisut suliaq annertuninngorlugu isigiumavaat, nunatsinnilu nalliuttorsiornerit ullorsiornerillu allanngortinnissaanut nalilersoqqinnissaat tunngavissaqarnersoq

¹ Oqaaseq ”ullorsiorneq” nassuiarnerani UKA2018/166-imit Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap isumaliutissiisummi atugaa innersuusutigineqarpoq.

misissorneqartariaqartoq isumaqarlutik. Ullumikkut ullorsiornerit nalliuttorsiornerillu inuiaqatigiit tamarmik pingaartutut naapertuuttutullu isigisaat naalliuttorsiutigisarpavut?

Tamanna tunngavigalugu Naalakkersuisut matumuuna allannguutissatut siunnersuut saqqummiuppaat:

Kulturikkut kingorngussavut ullumikkullu kulturerput aallaavigalugit ullorsiortarnerit pilersinnissaannut iluaqutaasinnaasut ajoqutaasinnaasullu misissorneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup ullukinnermik misissuinermit suliffeqarnermi illuatungeriit aamma kulturitsinnik suliallit soqutigisaqatigiillu allat attuumassutillit suleqataatillugit qulaajaaneq ingerlanneqarniarpoq.